

四庫全書

集部

欽定四庫全書

集部

攻媿集卷一百十二

詳校官右中允<sub>臣</sub>薩敏

主事<sub>臣</sub>呂雲棟覆勘

總校官庶吉士<sub>臣</sub>倉聖脈

校對官中書<sub>臣</sub>袁文邵

謄錄監生<sub>臣</sub>席大賓

欽定四庫全書

攻媿集卷一百十一

宋樓鑰撰

北行日錄上

時待次溫州教授隨侍充公守  
括蒼受仲舅汪尚書大猷之辟

乾道五年己丑十月九日辛卯邸報仲舅侍郎充賀正

使曾總管觀副之

十日壬辰蔡興以仲舅書來辟充書狀官二親許一行

是日游南園微雨

十一日癸巳雨飯裝

十二日甲午陰

十三日乙未雨

十四日丙申雨李器之以鳳樓梧餞行

十五日丁酉雨周仁甫約同登途

十六日戊戌晴仁甫酌別于少微閣醉中唱和

十七日己亥晴

十八日庚子晴飯後別二親徑出城張子質一見于驛

亭仲兄器之元聲弟漳相送至壽寧寺仁甫繼至飲罷  
東行宿巖泉夏家店去城十五里

十九日辛丑晴行二十里飯午頓驛行二十五里宿荆  
山上方

二十日壬寅晴早登小樓眺望行十里飯蔣家店過縉  
雲縣少候仁甫即行道經放生潭山水秀發策杖縱觀  
聞有趙侯廟鄉人敬之石有如杖如履如壺如舟者皆  
以侯名雙頭巖白巖烏巖皆奇偉白巖峭立臨溪松竹

秀潤烏巖下有石室端植如門渡溪入仙都玉虛宮路  
回顧南岸石筍森列有亭翼然僕夫曰此初暘谷也中  
有石鼓扣之有聲以既濟不復往路轉山回已見獨峯  
大松夾立清溪映帶眇視林間有巨石屹據如雪且行  
且觀遇道童問石之名云有洞名忘歸既懲初暘之失  
遂回登焉洞中可容數十人四旁嵌空如出鐫斲旁有  
小洞又一石橫陳如臺松風清微俯和湍瀨是真使人  
忘歸也下行里許益近獨峯峯之上相傳有鼎湖嘗有

巨蓮葉因風而下石壁隱隱有車轍世言黃帝由此飛  
昇塘曰黃履言遺履之地地曰靜樂言鈞天至此而不  
聞峯後大山如屏奇石嶄萃始望之高列峯外自謂倘  
登其上必可俯瞰鼎湖下有銳石僅如一筍及即之後  
山靡迤而退聽石筍亦不可跂及而此峯獨上摩穹漢  
巍然削立無階而升人有捫蘿登後山之巔者猶覺未  
及強半是知此峯真衆山之宗非凡目所可窺測也後  
山有石空洞躋攀而上一竇通明昔劉先生于竇之外

橫木為床以居至今遺簣猶在號隱真洞高不可登恨  
望久之循峯而止又有山水洞一名鏡巖懸崖數十尺  
級石以上石罅有水僅如屋漏終古不竭下鑿小泓貯  
之名公遺墨鑿滿四壁迂叟介夫趙清獻公皆在焉攜  
酒對酌清坐移時亦記歲月而還再至峯下大書姓字  
小憩宮前兩亭顧瞻偉觀兀不得去洞心駭目生所未  
見入據上方相與痛飲賦詩醉墨淋漓揮掃滿壁秉燭  
朗誦傍若無人詩榜櫛比蓋自香山居士而下不知其



幾閱十之三四不能盡讀也宮前有門書祈仙總真洞  
天是日行四十五里

二十一日癸卯晴早復筆詩于版各置醉墨高處謁黃  
帝祠宇李陽冰篆額今留縣庠聞有上宮名妙庭相去  
三里而近他無勝槩有洞名金龍一竇通獨峯下僅容  
小兒出入而其中甚寬宣和間嘗以金龍鎮之為睦寇  
盜去腳力既倦不得窮歷出門相羊峯下絕溪而西數  
里間山川猶競秀未已有徐氏小亭橫跨練溪小憩而

行三十里飯黃碧村醪醇釀不殊家釀二十八里宿和尚店去李溪猶二里會倅聽一兵楊靖自紹興回因發家書第一封錄所題仙都二詩寄仲兄

二十二日甲辰夜微霰早陰晴行二十七里飯諸應行三十餘里至龍窟行五里宿尚書塘

二十三日乙巳晴行二十里飯楊溪仁甫由新塘路往四明分袂于此田間行久之猶能相望將入山舉手一揖而別四十里宿橫塘暮嶺間張家店途中惟售溪坊

酒頗佳然比之黃碧味不及而價又三倍深夜微雨即霽

二十四日丙午晴行十餘里入東陽縣先見同年姚尉

瀛次見王宰楫為諸卒批旁小憩一店尉已先至再三

留一飯力辭之行十里飯愛頭孫家渡溪行五十里宿余店蓋過蘇谿八里矣夜微雨

二十五日丁未微雨作而復止行二十二里飯羅嶺下篆坑何店行三十五里宿義井夏店過牌頭十里

二十六日戊申晴風過平厯遇客將李濬等回發家書  
第二封行三十里飯高擁楊家行三十五里宿灰竈頭  
於店

二十七日己酉晴行三十里飯溪口傳店行三十里宿  
漁浦鎮上朱店東陽士人周忠厚同邸清話久之夜分  
小雨作

二十八日庚戌微雨辰已間晴早作飯了同周君行數  
里三憩方到渡頭裝載既畢潮落舟膠監渡厲君以小

舟般剝已又加一舟蕩兀波間久之大舟既前復挈行李裝載勞擾良甚又艤棹食頃挽絳徐行近廟山始用櫓潮上方急篙櫓努力欲進為山石所激進寸退尺舟人失色少縱復上久方得過又挽行十餘里雨霽風靜一波不興至六和塔下登岸已薄暮矣驅馳至嘉會門閉關已久宿俞家店是日又有松陽一士人姓葉同渡二十九日辛亥晴早起入城館于仲舅家飯罷侍叔舅同去偽謁副使曾總管因登三茅山上步司教場觀仲

舅習射夜發家書第三封

三十日壬子晴同去偽見劉察院待范郎中成大久之

竟不見客次遇蔡架閣霖去歲書狀官也又遇留丞正

臣飯季舅家發承局繆欽歸以第三書行

十一月一日癸丑晴講禮何季膺葉先生憲平問丘監

丞尤監簿袁訪及仲舅赴副使會

二日甲寅晴同去偽習儀都亭驛部中見梁監門叔玠

范文呂郎中正己赴景孟舅晚飯

三日乙卯晴習儀驛中已不及習于參政府梁郎中訪及

四日丙辰天明微雨即霽使副以下習儀驛中閱禮物授衣衫翟緝及承局翁葉行兩發家書仲舅招副使飯五日丁巳晴習儀政府候黃御藥甚久周邵州

伯駿

王

智叟沈尉

德潤

葉主管

蕭

訪及

六日戊午晴驛中大習儀使副以下備衣冠賈國信

竑

六知閣

張說張掄宋鈞宋直溫康諤王抃

偕來歸寫奏藁

七日己未雨侍叔舅偕去偽赴何季膺陳叔強早飯于  
豐樂樓

八月庚申陰發行李上船

九日辛酉雨下遮擔籠

十日壬戌晴飯了登舟高伯定劉君任送出門張伯純  
劉邦達送過赤岸景孟舅姜子用沈澤遠王智叟約送  
長河

十一日癸亥晴飯時過長河九十里遣第六書發周德



歸午過崇德蘇彭年來迓水縮舟膠牽挽寸進更初遇  
士穎弟于官窰

十二日甲子晴飯時過永樂行二十七里至秀州仲舅  
入城回謁閘頭登舟風作李同年

唐鄉

相見

十三日乙丑晴四更行六十里過平望姚漕相訪仲舅  
破睡見之行四十五里過吳江又行四十五里至平江  
仲舅入城回謁船由城外至閘門叔舅別去一夕行九  
十里

十四日丙寅晴早到無錫攜刺謁孫饒州父子中途聞  
其入城遂謁喻郎中標以謝去春先辱魏子師子智訪  
及行九十里深夜去毘陵數里泊

十五日丁卯晴生朝作湯餅遣人訪李表兄長卿已同  
王直甫候于門蘇彭年亦來皆延入船相見王江陰正

己惠茶并公醢蘇李別于荆溪館直甫同行十里待書

而別徐協恭過船寨戰三十六里過奔牛又十八里過  
呂城月明水深挽舟甚駛夜行五十四里過丹陽縣約

五更矣

十六日戊辰晴行二十七里小泊新豐又二十七里過  
丹徒鎮行三十六里午後到鎮江以水澀良久方抵丹  
陽館沈抑強中立既迓于門又攜具館下協恭同集使  
人通問于王侍御

十七日己巳晴上館盟櫛仲舅欲同謁王侍御而侍御  
已在門侍季舅同沈抑強去偽別侍御聞泊舟金山因  
約同遊窮覽勝處主僧寶印首座心鑑皆嘉州人侍御

方赴夔州不謂得見于此以小詩道別又辱和篇入船  
別其家遂歸仲舅招副使早飯抑強復攜具來嚴墨卿  
同集二鼓方散

十八日庚午晴四更起天微明即從使副到江干先登  
舟以待沈嚴二君相送晴和無風俄頃至瓜洲登岸未  
幾風作胡撫幹仲文俞尉茂先陸泰興況相送俟行李

上坐船即行薄暮至揚州城中水澀更餘方出城發第  
七書遞達親庭

十九日辛未晴三鼓報送伴鍾尚書

世明

等回仲舅起

相見前處州湯路分

逢時

為鍾引接送狼頭帽五指子

各一副拂手香四貼為發親庭第八書又以小舟來過

仲舅方與胡漕

昉

對語因與湯畧見于舟外少選鍾尚

書徐知閤

本中

船到仲舅見之約四更方得行辰時到

召伯埭去揚州纔四十五里以夜來留滯故爾張帆而行三十里過露筋三十里到高郵仲舅入城回謁兩岸然草如畫三十里夜過塘頭

二十日壬申晴三十里過界首二十五里過范水三十  
五里至寶應夜風雨行三十里過黃蒲二十里過平柯  
橋

二十一日癸酉晴辰時到楚州仲舅入城回謁登熙臺

應山陽

藏密

晏判官

詰

一揖于舟次三十里過磨盤三

十里夜過淮陰三十里過聞家峯

二十二日甲戌晴三十里到洪澤前去歐家渡極淺欲  
為般剝計使副偕潮于瀆頭神東北風作欲候酉潮而

申初已應開閘張帆三十里過瀆頭使副上廟挂幡又過數里舟膠而止

二十三日乙亥晴未明東北風大作潮亦先期而應談笑過歐家渡去瀆頭十五里一行人歡呼而行且感神呪之如響也行十五里至龜山以風大不可出淮擺泊山下見監鎮王九思曾同舍

二十四日丙子晴早出淮三十里至盱眙泊燕館下龔守鑒攜具宴使副約季舅去偽分冬發家書第九封附

遞

二十五日丁丑晴冬至早起乘馬陪使副天慶觀朝拜  
歸館望拜兩宮各展賀偕季舅去偽遊第一山玻瓈泉  
冰不可酌遍觀磨崖石刻見周司法深譙提轄熙載王

幹辦

茂

龔守就館請使副早食軍衙晚食

二十六日戊寅陰晴使副以下具衣冠習儀館中依例  
就皇華館犒三節人

二十七日己卯晴盱眙客將李寶渡淮探問接伴使副



已到泗州使副赴龔守晚會偕季舅去偽赴王幹辦之  
招

二十八日庚辰晴掌儀引接等渡淮傳銜少頃同北引  
接禮信司高琚等傳到接伴使副名銜正使昭武大將  
軍行尚書吏部郎中上輕車都尉彭城郡開國伯食邑  
七百戶唐括安德副使朝奉大夫侍御史騎都尉廣陵  
縣開國男食邑三百戶賜紫金魚袋高德裕使副坐燕  
館須其至攜以三杯而去移舟淮亭使副燕亭上偕季

舅去偽赴譙提轄會發第九書遣呂葵張吉歸

二十九日辛巳天明雪作使副以下巳時渡淮至泗州  
草館望拜如儀各就幕次三節人互參使副使副互展  
起居狀茶酒三行上馬入城天色開霽和氣翕然至館  
分位是日與季舅別

十二月一日壬午晴車行六十里臨淮縣早頓縣境有  
徐城本徐國嬴姓有徐君墓季札挂劍之所又八十里  
宿青陽鎮驛臨淮尉奪客牛以駕車為客所訴鞭條子

八十金法士夫無免捶撻者太守至撻同知又聞宰相亦不免惟以紫褥藉地少異庶僚耳

二日癸未晴風車行八十里虹縣早頓城門不容車乘馬入驛市井多在城外驛之西有古寺大屋二層瓦以琉璃柱以石聞其上多米元章諸公遺刻三年前于寺中待使客飯後乘馬行八十里宿靈壁行數里汴水斷流人家獨處者皆燒拆去聞北人新法路傍居民盡令移就鄰保恐藏姦盜違者焚其居有一鹿起草間截馬

前西去兩岸皆奇石近靈壁東岸尤多皆宣政花石綱所遺也虞姬墓在西岸荒草中橫安二石板相去尺餘隆興間我得泗虹以此墓為界縣外山上有叢祠漢高帝廟也淮北荒涼特甚靈壁兩岸人家皆瓦屋亦有小城始成縣道有粉壁云準南京都轉運帖理會買撲坊場遞鋪皆築小塢四角插阜旗遇賀正人使先排兩馬南去金法金牌走八騎銀牌三木牌二皆鋪馬也木牌最急日行七百里軍期則用之

三日甲申晴車行六十里靜安鎮早頓又六十里宿宿  
州自離泗州循汴而行至此河益堙塞幾與岸平車馬  
皆由其中亦有作屋其上州城新築雉堞甚整聞是五  
月下旬上畔指揮重修限四旬畢工費一出于民城中  
人物頗繁庶麪每斤二百一十粟穀每斗百二十粟米  
倍之陌以六十大寺數所皆承平時物酒樓二所甚偉  
其一跨街榜曰清平護以葦席市肆列觀無禁老者或  
以手加額而拜有倒卧腳引書鋪般販官局湯藥蔡五

經家餅子風藥去州二里許二郎廟前有下馬亭即李  
顯忠斬李福李保之地驛舍鄰郡治顯忠駐軍于此破  
城之初每兵止攜以三饌士卒憤惋及逃歸創殘之士  
不能自力悉碎于敵手為數坑埋之中庭有井自投者  
尤多負郭縣曰符離項羽破漢軍于靈壁東睢水為之  
不流即此縣界

四日乙酉陰晴風作車行四十五里蘄澤鎮早頓又四  
十五里宿柳子鎮晚小雪即止

五日丙戌霜寒頗力行人鬚髮皆冰六十里永城縣早  
頓驛中猶有燈縣本芒敬丘二縣地有芒山與碭山相  
接漢高帝隱于此漢更敬丘為太丘陳寔嘗為長故城  
在今縣西北又七十里宿會亭鎮

六日丁亥霜晴車行四十五里沙山岡換驢三十五里  
穀熟縣早頓縣即商之南亳湯所都也縣外有虹橋跨  
汴甚雄政和中造今兩傍築小土牆且敝損不可行絕  
河以入又二十二里至金果園果木甚多馬行十八里

入南京城市井益繁觀者多閉戶以窺夾道甲騎百餘城外及驛前皆步兵大樓曰睢陽製作雄古傾圯已甚驛曰睢陽穀熟甲卒自言西人月請五百短錢聞本朝養兵之豐歎感不已南京城樓側有亭名解慍承應人有自言姓趙者不欲窮問之云城中猶有徐太宰路樞密鄭宣徽等大宅多為官中所占亦有子孫居者按此地即高辛氏子閼伯所居高丘也武王封微子啟是為宋國後唐以為歸德軍節度本朝以王業所基景德四



年升應天府祥符七年升南京金改曰歸德府漢梁孝王所都兔園平臺雁鶩池蓼堤皆在此春秋隕石五猶存

七日戊子晴車行六十里寧陵縣早頓古葛伯國湯所征也魏信陵君無忌封于此又六十里宿拱州本襄邑縣屬開封崇寧四年建名輔州以為東輔又改拱州治襄邑本宋承匡襄陵鄉也襄公所葬故曰襄陵金曰濰州

八日己丑晴車行六十里雍丘縣早頓縣故杞國武王  
封禹後東樓公故至今土人猶曰杞縣祖逖鎮此以禦  
石勒圍城鎮在東南本漢圉縣屬睢陽國王莽擊翟義  
為京觀于此漢外黃縣故城在東又有葵丘齊桓公所  
會也承應人杜從自言邑手分邑有令簿尉酒稅都監  
同監共五員二稅輸粟及米亦納絹但薄而小此間只  
是舊時風範但改變衣裝耳又行二十里過空桑伊尹  
所生之地也又里餘過伊尹墓惟一大枯木在側斷碑

卧其下曰湯相伊尹之墓又數里過三塚駕車人自言  
姓趙云向來不許人看南使近年方得縱觀我鄉里人  
善見南家有人被擄過來都為藏了有被軍子搜得必  
致破家然所甘心也宿陳留縣去雍丘六十里驛中有  
蒼柏可愛縣本鄭邑為陳所并故名

九日庚寅晴車行四十五里道傍多陂塘路頗迂回古  
塚相望發掘無遺至東御園小亭少憩使副以下具衣  
冠上馬入東京城改曰南京新宋門舊曰朝陽今曰弘

仁城樓雄偉樓櫓壕塹壯且整夾壕植柳如引繩然先入甕城上設敵樓次一甕城有樓三間次方入大城下列三門冠以大樓由南門以入內城相去尚遠城外人物極稀疏有粉壁曰信陵坊蓋無忌之遺跡城裏亦凋殘街南有聖倉屋甚多望見婆臺寺塔云城破之所街北望見景德開寶寺二塔并七寶閣寺上清儲祥宮頽毀已甚金榜猶在皮場廟甚飾雖在深處有望柱在路側各挂一牌左曰皮場儀門右曰靈應之觀又有藥將

軍廟顏垣滿目皆大家遺址入舊宋門舊曰麗景今曰  
賓曜亦列三門由北門入尤壯麗華好門外有廟曰靈  
護兩門裏之左右皆有闕亭門之南即汴河也故街南  
無巷街北即甜水巷過鄭太宰宅西南角有小樓都人  
列觀間有耆婆服飾甚異戴白之老多歎息掩泣或指  
副使曰此必宣和中官員也相國寺如故每月亦以三  
八日開寺兩塔相對相輪上銅珠尖左暗右明橫過大  
內前逆亮時大內以遺火殆盡新造一如舊製而基址

并州橋稍移向東大約宣德樓下有五門兩傍朶樓尤  
奇御廊不知幾間二樓特起其中浮屋買賣者甚衆過  
西御廊數十步過交鈔所入都亭驛五代上元驛基本  
朝以待遼使猶是故屋但西偏已廢為瓦子矣

十日辛卯陰晴歇泊承應人有及見承平者多能言舊  
事後生者亦云見父母備說有言其父囑之曰我已矣  
汝輩當見快活時豈知擔閣三四十一年猶未得見多是  
市中提瓶人言倡優尚有五百餘亦有旦望接送禮數

又言舊日衣冠之家陷于此者皆毀抹舊告為北兵驅役號閒糧官不復有俸仰其子弟就末作以自給有舊親事官自言月得粟二斗錢二貫短陌日供重役不堪其勞語及舊事泣然不能已留守來謁接伴使副使副連一榻南向坐廳上留守設胡牀侍其左過盞勸酒翼而退接伴所得私覲物盡貨于此物有定價責付行人盡取見錢分附衆車以北歲歲如此又金人浚民膏血以實巢穴府庫多在上京諸處故河南之民貧甚錢亦

益少塗中曾遇蒲簍數扛導之以旗殿以二騎或云其中皆交子也都管愠其主人貪墨以穢語詆之又有萬福包待制之語承應人各與少香茶紅果子或跪或喏跪者北禮喏者猶是中原禮數語音亦有微帶燕音者尤使人傷歎

十一日壬辰晴賜宴既傳銜使副率三節人具衣冠出接伴位前對揖而出就褥位與接伴天使對立三節人立使副後先引使副東北向開轅兩拜天使烏庫哩璋



傳口宣云卿等遠持使節來會歲元適冒寒威宜加宴  
勞今遣具位璋賜卿等宴仍差南京留守耶律成押宴  
并賜教坊樂使副舞蹈五拜又開教兩拜再傳口宣云  
卿等來朝歲旦遠抗使旌爰增原隰之華宜有甘芳之  
錫今差璋賜卿等酒果使副搢笏跪左却义手受賜五  
拜舞蹈如儀還立褥位對展次揖接伴退就幕次與璋  
茶酒三行再立褥位引接石旦側跪捧表正使拜跪受  
表卻以授璋仍送土物與之璋退即引押宴出與接伴

拜舞謝恩押宴先升廳側立使副拜舞訖與接伴對行  
升廳與押宴對展訖就座點湯端笏離位少立三節人  
東北向再拜呼噪升廳占位東向南上小立俟使副初  
盞罷三節方坐初盞燥子粉次肉油餅次腰子羹次茶  
食以大拌貯四十標比平日又加工巧別下松子糖粥  
糕糜裏蒸蠟黃批羊餅子之類不能悉計次大茶飯先  
下大棗鼓二大餅肉山又下燂魚鹹豉等五標繼即數  
十品源源而來仍以供頓之物雜之兩下飯與肚羹三

下餠子五下魚不曉其意蓋其俗盛禮也次餅餤三次  
小雜椀次羊頭次燂肉次剗子次羊頭假鼈次雙下灌  
漿饅頭次粟米水飯大簇飣凡十三行樂次箏笙方響  
三次升廳餘皆作樂以送亦有雜劇逐次皆有束帛銀  
椀為搗使副以下皆離立以待謝恩或云所賜初不及  
皆文具耳第十二行依例勸上中節酒罷三節先就班  
使副進第十三行茶罷與押宴接伴謝宴拜表庭下如  
儀再送璋土物與璋成互展辭狀即與接伴對揖歸位

送押宴私覲往回自此每賜宴禮數準此食味樂次大同小異

十二日癸巳晴五更出驛穿御街循東御廊過宣德樓側東角樓下潘樓街頭東過左掖門出馬行街頭北過東華門出舊封丘門金改曰玄武新封丘門舊曰安遠金改曰順常河中有亂石萬歲山所棄也北郊方壇在路西青城在路東面南中開三門左右開掖門西開一門以通壇皆荒墟也北門内外人煙比南門稍盛車行

四十五里飯封丘又四十五里宿胙城縣途中遇老父  
云女壻戍邊十年不歸苦于久役今又送衣裝與之或  
云新制大定十年為始凡物力五十貫者招一軍不及  
五十貫者率數戶共之下至一二千者亦不免每一軍  
費八十緡納錢于官以供此費東京有千戶二十一人  
各有三四百人共有八千兵耳有張千戶者向來率其  
人戰符離一敗止存數十人至此除籍為民又言簽軍  
遇王師皆不甚盡力往往一戰而散迫于嚴誅耳若一

一與之盡力非南人所能敵符離之戰東京無備先聲  
已自搖動指日以望南兵之來何為遽去中原思漢之  
心雖甚切然河南之地極目荒蕪蕩然無可守之地得  
之亦難于堅凝也胙城之南有南湖去歲五月河決所  
損甚多河水今與南湖通衝斷古路用柴木橫疊其上  
積草土以行車馬按東京春秋衛陳鄭三國之境戰國  
屬魏東魏立梁州後周改汴州興元為宣武軍節度使  
後梁以州建國升為東京開封府後唐復為汴州晉漢

周本朝因梁舊汴河古葭蕩渠首受黃河水隋煬帝開  
浚兼引汴水開封縣有浚溝即衛詩浚都也有沙海戰  
國策顏率言大梁君臣欲得九鼎謀于沙海之上蓼堤  
自睢陽至此三百里吹臺今曰繁臺本師曠作孝王增  
築祥符縣有夷門山夷門大梁城之東門侯嬴抱闕于  
此蔡河古琵琶溝也寒泉阪詩所謂爰有寒泉在浚之  
下中牟縣趙襄子時佛肸以叛有中牟臺是為官渡城  
曹袁相持之所陽武縣有博浪沙張良擊始皇于此河

決金堤亦此地長垣縣衛之匡邑孔子畏于匡古之蒲  
邑子路為之宰鄆陵縣克段之地也封丘縣古封父國  
左傳所謂周以封父之繁弱賜魯縣有黃池吳王夫差  
所會胙城屬滑州故南燕國周公諸子所封左傳富辰  
曰凡蔣邢茅胙祭周公之胙也

十三日甲午晴五更車行四十五里到黃河因河決打  
損口岸去年人使迂行數十里方得上渡今歲措置只  
就淺水冰上積柴草為路里餘車馬行其上策策有冰



泮聲遇深險處即有人跣立道傍指示使驅車疾行河心有沙渚甚闊蓋河決時所淤積者一行人兵車馬盡于此登舟渡舟底平無篷屋于船頭品字用抄兩傍又以大枋為槳併力喝號使副以下露坐其中分數舟以渡風靜不寒上下冰合僅二寸許惟通舟處見水面數丈此李固渡本非通途浮橋相去尚數里馬行三里許飯武城鎮一名沙店車行四十五里宿滑州途中有土山夾道塵埃最甚咫尺不可辨俗號小灰洞蓋前路有

甚于此者路西有白龍潭傍有大碑蓋亦是昔年河決所溺也滑即古豕韋氏之國春秋戰國屬衛負郭白馬縣本衛國曹邑狄滅衛立戴公以廬于曹袁紹遣顏良于白馬關羽斬良以報曹公酈生所謂守白馬之津皆此也有滑臺本鄭之廩延

十四日乙未晴五更車行二十五里至濬州城外乘馬入城早頓東廊有大碑曰天成橋太師魯國公蔡京奉聖旨書濬依山為州子城據山上故州在今郡城之北

紹興初河失故道蕩為陂澤遺堞猶有存者舊河卻為  
通途東有黎陽山因以名縣聞上有大佛與館相直橋  
之兩岸也馬行三十里過屯子河河出太行泝流而上  
可至燕山故金人又名清御河築三橋以濟行者望范  
公善化二山是日供黃河鯪魚甚鮮而肥始作家饌道  
遇細車自北來先牌云蔡州都巡檢使宅眷與接伴使  
有連各下車相見一嫗一婦與正使皆屈膝拱手搖肘  
為禮然後立談良久而去復車行四十五里過伏道望

扁鵲墓墓前多生艾功倍于他艾經伏道河伏道店入  
湯陰縣縣有重城自此州縣有城壁市井繁盛大勝河  
南縣屬相州本二漢蕩陰縣姜里城在東南

十五日丙申晴四更車行三十六里至相州城外安陽  
驛早頓馬入城人煙尤盛二酒樓曰康樂樓曰月白風  
清又二大樓夾街西無名東起三層秦樓也望傍巷中  
又有琴樓亦雄偉觀者如堵大街直北出朝京門牌曰  
通遠門皆甕城相即河亶甲所居魏文帝後趙石季龍

前燕慕容雋北齊皆都焉東南二十五里朝歌城紂所  
都也中出蒿草冢多故相纘名天下俗傳漂杵餘血所  
化也門外過安陽河至更衣亭有脊記大金正隆三年  
八月二十九日光祿大夫彰德軍節度使開國公鄭建  
元移建雖規模甚草草然所創見也至此從便馬行每  
十里置一馬鋪及所過豐樂鎮居民頗多皆築小塢以  
自衛各有城樓西望太行頗為風埃所蔽土地平曠膏  
沃桑棗相望至漳河水縮沙出中多石子俗傳可以煖

腹南向循河行三四里于陋處作柴橋以渡層冰峨峨  
中有水甚駛載冰漸以東聞水盛時至與高岸平闊可  
數里土人號小黃河北行沙中又數里復渡一小橋即  
漳支流也回望鄴鎮有塔古都皆在其地聞魏銅雀臺  
故基猶在昔為縣金以為鎮矣經講武城猶有壁壘氣  
象雄壯有將臺甚高城外高丘相望號七十二塚世傳  
曹公之葬以此惑後人使不至發掘或云其家數世所  
葬有廟屋甚雄即曹公祠也塚間又有螭首碑聞是晉

碑六十里過滏河上有觀魚亭頗新壯少西百餘步入磁州城門與州治相近篆牌字甚穩大定五年所立過惠政門入禮賓坊又有東溪在驛之東聞其中是郡庠有士人十餘人夜宿滏陽驛之東北望見崔府君廟靈星門并廟棟使副以下焚香遙謁是日相州承應人狀貌甚偉衣冠亦楚楚呼問之云姓馬有校尉名目以少二百千使用一坐二十年不調非錢不行也既無差遣多只監本州酒稅務又言並無俸祿只以所收課額之

餘以自給雖至多不問若有虧欠至鬻妻子以償亦不恤且歎曰若以宋朝法度未說別事且得俸祿養家又得寸進以自別吏民今此間與奴隸一等官雖甚高未免簞楚成甚活路又本州以相纘百疋分獻接伴

十六日丁酉晴自南京來飲食日勝河北尤佳可以知其民物之盛否自是不必家饌矣車行七十里邯鄲縣早頓有城及樓甚壯皆舊物也未至三里許有舊城戰國趙都漳水相去三十里許漢高祖征陳豨至此曰豨



不南據邯鄲而阻漳水吾知無能為也趙王叢臺在縣  
之北上有亭榭馬行四十里宿臨洺鎮洺河出其下隸  
洺州永年縣館舍極寬潔前有大廳傍列三節位次廳  
後主廊方分使副位廳有脊記鎮國大將軍充洺州防  
禦使護軍開國侯食邑一千戶食實封一百戶吾古論  
薩哈重建吾古論意即烏庫哩因語訛耳薩哈曾以兵  
部侍郎來泗州理會俘擄人又聞彼中有三等官漢官  
契丹女直三者雜居省部文移官司榜示各用其字吏

人及教學者亦以此為別道傍數處賣酒皆掘地深闊可三四尺累塊上風以禦寒一瓶貯酒苫幕為望石炭數塊以備煖盪河朔之樸如此道中有一瞋尸棚其俗行有死者不埋立四木高丈餘為棚其上以荆棘覆其戶以防鴟梟狗鼠之害立一牌以記其名姓年月有人識認則從便葬埋否則任之

十七日戊戌晴車行三十五里過沙河縣屬邢州縣有重城換驢行二十五里至邢州今榜曰安國軍甕城三

重入門直對州衙東入邢臺驛早頓過七教坊椽木巷  
立節坊成義坊熙暉樓市肆牌額多寫般作馱有大塔  
十三層寺宇亦雄壯北門外陂塘冰厚尺餘齋疊岸上  
如柱礎然青瑩如菜石三里至柳溪唐柳公權遺跡亭  
榭數所引溪水載之高岸流觴曲水為邢臺遊觀之地  
東北有邢山出邢沙碾玉所用也過沙河數處春夏間  
皆不可徒涉四十五里宿內丘縣沙河縣漢襄國縣地  
邢即春秋邢國衛滅之戰國屬趙漢常山王張耳後趙

石勒皆都焉勒陷冀州張賓曰襄國因山憑險形勝之地可都也內丘亦屬邢有干言山詩所謂出宿于干飲  
餞于言者

十八日己亥晴車行六十里柏鄉縣早頓舊日堯山即  
柏人也漢高祖心動不宿之地六十里宿趙州道中過  
漢光武廟有塑像坐而侍者四人云是宰相不著姓氏  
壁間畫二十八將廟屋止一間廊廡故基甚廣碑石露  
立者凡四一開元十九年本郡進士李雲撰范陽盧規

書一開元廿二年立皆對偶文也餘皆本朝所立有二  
石人皆腰斬道傍俗云光武欲北渡滹沱有二人捧漿  
以進行數里恐追襲者得其踪復還斬之或云夜遇二  
人問途不應怒而斬之已乃石也行十里由王郎城縱  
廣約數里去趙州五里使副以下觀石橋橋有石欄高  
二尺餘上分三道下為洞橋兩馬頭又各為二洞傍為  
小亭板閣以入石理堅緻題刻甚衆多是昔時奉使者  
有云連鵬舉使大金至絕域實居首選宣和六年八月

亦有天會中回謝大齊使人留題不能盡讀橋上片石  
有張果老驢迹四遇一夫自言舉人問所業云通三史  
試詞賦論策然褐衣與阜隸無別上馬入城外驛負郭  
曰平棘縣今改曰沃州春秋屬晉戰國屬趙後魏曰殷  
北齊曰趙隋曰藥為慶源軍節度使臨城縣有泚水韓  
信斬成安君于此是日聞接伴使之兄左丞安禮罷為  
滄州刺史初安禮娶金主之妹妹死欲妻以女辭以不  
當復娶妻姪強之不可金主怒以抗敕坐之道逢重車

三載鐵餘載板木欲修河橋

十九日庚子晴風車行三十里藥城縣早頓晉大夫藥氏之邑又七十里宿真定府城外館館分東西道中見掃帚桑特起林中數尺枝條叢細宛如帚狀稍指東南或謂此方有居民受其蔭者過滹沱河由土橋以行河側有開凌村以光武渡河未畢數車而冰陷俗傳河冰隨車而拆故以名自河以北每五里許必有小舍或在古塚上每夜輪保甲十人宿其中以伺察行者真定在

春秋時屬鮮虞國為晉所滅戰國屬趙漢為恒山郡文帝改常山本中山國之東垣陳豨將趙利守此高帝攻拔之改曰真定元和改鎮州五代改曰真定府唐叛將李寶臣王武俊王廷湊等皆據此

二十日辛丑晴歌泊住驛

二十一日壬寅晴賜宴東館口宣云來持使節遠冒寒威宜頒在鎬之恩以示禮賓之意又云遠涉道途衝冒霜雪爰嘉勞勩宜錫芳甘禮悉如汴京但第三第四行



及飯遍使樂人舞旋大茶飯中有沙糖熊白使副下食  
人趨進尤肅押宴下人李泉爭執禮數語具語錄泉撻  
條子六十其徒三人各三十每一下必令毒打十下易  
一人不惟三節人快之雖都管監門吏卒皆怒其生事  
無不稱快俗雖好勝要可以禮屈也安德為開州刺史  
以治行聞道中頗讀莊子故臨事間有可觀然貪昏狠  
愎不知何以有政聲益知北方守令難得循良者

二十二日癸卯晴四更車行七十里飯新樂縣尤度庶

古鮮虞國也又四十五里宿中山府靖康之禍真定中山皆固守不下中山城外猶有敗城圍之金所築也此地堯所始封戰國初為中山國魏文侯使樂羊伐取之以封太子擊後燕慕容垂移都後魏為安州唐改定州城門曰昭化甕城三里甚壯城濠有流水過信利鮮虞高陽三坊坊各有小樓又有明月樓道傍多重車有先牌云輔國新授西京同知留守子城門亦雄偉曰中山門兩傍亦有挾樓入門東行百餘步入驛子城西門曰

夕陽樓卽望長安詞所作之地北去又有仁教化原二坊負郭安喜縣令姓夾谷酒名曰九醞曰瓊酥

二十三日甲辰晴天氣清寒方思近火四更車行五十里望都縣早飯縣有城樓又七十里宿保州城壕甕城皆三里城約厚十餘丈門曰雞川負郭為保塞縣驛曰金臺燕昭王遺迹也驛西城上有亭曰富覽御莊聞在西上四十里過鴻福院三門有樓崇積倉道西有小門榜曰教女直學州樓曰順天軍驛在州治西南驛分東

西供張如法屋宇寬潔初至望都聞國主近打圍曾至此自後人家粉壁多標寫禁約不得採捕野物舊傳為禁殺下令至此乃知燕京五百里內皆是御圍場故不容民間採捕耳皇朝初置保塞軍後升為州政和三年為清苑郡望都堯母慶都所居堯山在北慶都山在南登堯山見慶都山故名望都

二十四日乙巳晴五更車行四十五里至安肅軍南城  
外上馬由城中又入北城驛早食軍本遂城縣屬易州

皇朝置靜戎軍後改焉二城甚固南城南門三重北門一重為安肅縣治有雄威營二所北城兩門各二重二城之間有濠塹水櫃積冰甚多方取以入窖又有祥光塔福善寺食罷又乘馬出北門過一大廟或云北嶽行宮車行二十五里過白溝河又五里宿固城鎮人物衣裝又非河北比男子多露頭婦人多耆婆把車人云只過白溝都是北人人便別也

二十五日丙午晴五更車行三十里定興縣早食縣本

欽定四庫全書

卷一百十一

黃村近以為邑今歲九月方築城四旬畢工雉堞甚整  
獨門樓未起驛舍亦創造始待使客于此又六十里至  
涿州漢高帝立涿郡魏文帝更名范陽新城縣有督亢  
陂溉田號為膏腴即太子丹所獻督亢地圖也入宣清  
門過釋迦普賢堂商稅務范陽縣樓入子城城無門上  
有清風樓兩傍土累為高臺左曰迎月樓右曰棲霞樓  
州治在道西門廡陋甚館驛尤湫隘天使高德亭傳宣  
撫問虞友益賜銀合湯藥銀合二十五兩藥十貼皆客

路所資以紅綾為貼有曰每服一榛子大如南方之比  
梧子也錄其語如後敕某卿會朝歲旦蒙犯寒威眷惟  
將命之恭有加勞勩宜錫衛生之物迎致沖和今差入  
內內侍御直郎虞友益賜卿湯藥一銀合往堂祇受故  
茲詔諭想宜知悉冬寒卿比平好否遣書指不多及二  
十五日敕某複名不書姓副使書姓名

二十六日丁未晴五更車行六十里良鄉縣早食因宿  
道中以瑠璃河

或云劉李河

堤岸為水所壞又迂行二十里

方抵縣縣有城門二重衙在道左驛在北門牆下有  
防山

二十七日戊申晴風大作抵暮不止四更初車行六十  
里過廬溝河至燕山城外去燕賓館百餘步使副上馬  
三節具衣冠隨入館中亭子館伴傳衙正使起復正議  
大夫都水監上輕車都尉安定郡開國伯食邑七百戶  
賜紫金魚袋梁肅副使廣威將軍尚書工部郎中上騎  
都尉廣平郡開國子食邑五百戶圖克坦子澄

圖克坦舊作



徒單  
今改

肅兼押宴白琮賜宴李顯金賜酒果酒九行罷入  
城道傍無居民城濠外土岸高厚夾道植柳甚整行約  
五里經端禮門外方至南門過城壕上大石橋入第一  
樓七間無名傍有二亭兩傍青粉高屏牆甚長相對開  
六門以通出入或言其中細軍所屯也次入豐宜門門  
樓九間尤偉麗分三門由東門以入又過龍津橋二橋  
皆以石欄分為三道中道限以護甯國主所行也龍津  
雄壯特甚中道及扶欄四行華表柱皆以燕石為之其

色正白而鐫鏤精巧如圖畫然橋下一水清深東流橋  
北二小亭東亭有橋名碑次入宣陽門樓九間分三門  
由西門入會同館館在內廊之西南向入館門使副與  
館伴立馬下節人從互聲兩喏傳示訖分位張鉉撫問  
琮口宣云遠持使節已次近郊宜示宴慈以彰眷遇顯  
金云遠乘輶傳已次國門宜有寵頒以休勞勩鉉云會  
朝歲旦弭節宴亭爰念勤勞宜加省問

二十八日己酉晴風止賜酒果口宣云已休候館將造

明庭方修進止之儀宜有甘芳之錫閣門副使左光慶  
到館說朝見儀

二十九日庚戌晴天明行司捧國書上馬前行使副上  
馬與館伴並行入見館之西有門門外皆民居宣陽門  
內街分三道中有朱欄二行跨大溝為限欄外植柳高  
麗人西夏人二館在東與會同館相對立馬門外俟使  
副一行既過方相繼而行長廊東西曲尺各二百五十  
間廊頭各有三層樓亭護以綠欄杆廊有三路貫其中

南路兩門外皆民居中路無門而路甚闊左為太廟右為三省北路左門外有屏牆夾道中有官府南向右門入六部蓋在三省之後也正門十一間下列五門號應天門左右有行樓折而南朶樓曲尺各三層四垂朶樓城下有檢鼓院又有左右掖門在東西城之中兩角又朶樓曲尺三層初出館橫過馳道皆卻蓋三節人至東廊北頭下馬使副至左掖門皆步而入左掖門後為敷德門其東廊之外樓觀翬飛聞是東苑西廊有門即大

安殿門外左翔龍門之後敷德後為集英門兩門左右各又有門集英之右曰會通其東偏為東宮西有長廊中起高樓即大安殿前廣祐樓也會通門內之西廊即大安之東榮為麗夏茶酒幕次其後為承明門北向相對為昭慶門東為集禧門西即左嘉會門之後相對有右嘉會門其中即大安殿後宣明門之前待班幕次在其西敷德之西門及會通承明左嘉會皆所由之路也入宣明門及仁政殿左門在隔門外當中立俟百官裏見

退即左入殿下大氈上上有一品至七品牌子蓋是其  
朝著也氈中有大花鳳使立鳳花之中副在其右大殿  
九楹前有露臺金主坐榻上儀衛整肅殆如塑像殿  
兩傍廊二間高門三間又廊二間通一行二十五間殿  
柱皆衣文繡兩廊各三十間中有鐘鼓樓垂紅緣金漆  
簾簷頭皆挂繡額亭下有撮椒井亭二宣明門三仁政  
殿側門二皆列戟殿門外衛士二百人分列兩階皆戴  
金花帽錦袍宣明門以外直至外廊下除麗夏幕次前

皆甲士青條甲居左執黃龍旗紅條甲居右執紅龍旗  
外廊下皆銀鎗自左掖門以入皆金鎗執鎗者具裝門  
以執弓矢者一被七分甲人依一柱以立每數人必以  
一女真衣皁緊絲衫者部之凡門屋下皆素隊挾弓矢  
大門四十人小門二十人惟仁政左門用甲士皆自未  
明分立訖見退無有移動者是日高麗西夏使人同見  
高麗使三綱衣冠如本朝一為賀正一謝遣使一謝賜  
羊酒上節幟頭犀偏帶中節折上巾犀束帶下節獻頂

巾犀束帶皆紫衫西夏使二綱一賀正一謝遣使皆以  
正子為正使戴金冠製作甚工朱袍蹀躞狀貌甚偉副  
使衣冠如高麗人三節皆不入見椎髻被髮小巾尖帽  
皆夷服也西夏人進禮物十二牀馬二十匹海東青七  
細狗五亦旅于庭馬嘶狗吠頗亂朝儀隔門在殿門後  
簷下上以木雕為銅瓦小拱甚巧麗隨門五間每間朱  
門四扇金釘粲然入見如儀受衣帶而退就館賜茶酒  
左宣徽使敬嗣暉押伴賜宴之禮押宴與正使對坐接



伴使副坐押宴下副使對二者之中惟茶酒則小異本  
是殿上置酒多就館安排必以兩府為押伴押伴廟坐  
使副接伴對坐兩傍立班及對揖位次必差向前嗣暉  
雍容莊重而善應接嘗使于我盡記朝儀以歸國中典  
章禮文多出其手舊為宣徽力諫亮南牧削籍為民新  
主立復用之

三十日辛亥晴賜宴館中完顏宗嗣賜宴烏庫哩璋賜  
酒果完顏彥押宴宴罷館伴送葡萄酒

攻媿集卷一百十一

欽定四庫全書

攻媿集卷一百十二

宋樓鑰撰

北行日錄下

乾道六年庚寅正月一日壬子晴使副率三節官從望  
拜兩宮交賀禮畢上馬與館伴同入賀由應天東門步  
入東廊幕次中大安殿門九間兩傍行廊三間為日華  
月華門各三間又行廊七間兩廂各三十間中起左右

翔龍門皆垂紅緣簾庭中小井亭二幕次與高麗使相鄰西夏仲相對客省茶酒罷已初錦衣衛士又益以青錦袍五十餘人列立大安門庭下百官排班朝日太子為班首四拜約近三百餘人既罷客省引使副由月華門隨百官班入賀太子錦褥四鎮以銀猊出衆班中立次宰執親王次有十餘人皆金帶紫袍使副立西偏肅與子澄亦在此列意是以館伴之故不然郎官卿監不應如是之少也其後又有二百餘人預宴者除親王宰

執四十餘人餘皆賀畢先退訖事凡五十七拜五次舞蹈二十五拜初入班并三次上御酒各再拜上壽罷唱興卿等同慶又四拜勸壽酒兩次共四拜初登殿就坐致語宴罷各兩拜酒七行第一行宣勸在坐兩拜第二第四第六行獨勸使副各兩拜每宣勸必先離位而立搢笏受盞赴坐宴罷謝恩拜于殿上又拜舞于丹墀而退進御酒時卻不起立餘皆如本朝之儀衛士甲卒如入見時殿下砌階兩道鎗子郎君紫衫幘頭執柱斧佩

弓矢刀劍面殿分立凡五十人聞柱斧中藏鎗刀皆軍  
官子弟也大安殿十一間朵殿各五間行廊各四間東  
西廊各六十間中起二樓各五間左曰廣祐後對東宮  
門右曰弘福後有數殿以黃琉璃瓦結蓋號為金殿聞  
是中宮殿上鋪大花氈中一間又加以佛狸毯主座并  
茶牀皆七寶為之卓幃以珍珠結網或云皆本朝故物  
卓前設青玉花六朵看果用金壘子高疊七層皆梨瓜  
之屬其次皆低釘細果傍設玉壺以貯餘酒未至時覆

以真紅繡衣既坐八人皆公裳舁以前分兩翼卻行以退榻前服玉帶者八人太子許王對坐次二丞相餘不知何人其後各金帶者六人使副與左右丞相對在玉帶之南稍後自金帶以下皆用銀器榻後照屏畫龍如本朝頂為大金龍盤其上餘十間皆結戛頂小拱三層皆以金為小龍間置其中曲折皆釘以繡額壁柱衣繡幃中各有龍又有金香猊金龍山各二露臺三層兩傍各為曲水石級十四最上層中間又為澀道亦覆以氈

上壽酒時太子獨至澀道下捧盃以進者三山棚起十  
一峯號仁壽山山下栽松柏并裝桃李各十餘株大獅  
象各一背負七寶又以綵索繫棚之前為小獅子二以  
蔽其杙弘福廣祐之前又各為綵樓三間三節人宴東  
廊下高麗使次之西夏使與對二國三節人雖預宴不  
拜于庭其餘廊屋皆垂黃沿簾伏甲其下殿前都副點  
檢完顏仲烏庫哩元忠二人各執柱斧率其徒十人立  
御榻兩傍東西向榻後近侍八人各執其物終席不見



宦者每上國主酒係宣徽使敬嗣暉等互進以金托玳  
瑁椀貯食卻只覆以金釵紅木淺子令承應人率爾持  
進其禮文不倫如此樂人大率學本朝惟杖鼓色皆幞  
頭紅錦帕首鵝黃衣紫裳裝束甚異樂聲焦急歌曲幾  
如哀挽應和者尤可怪笑宴罷歸館

二日癸丑晴張鉉賜分食圖克坦通賜酒果

圖克坦通舊作徒

單通今改

分食二盤一盛大肉山以生葱棗栗飾之其中藏

一羊頭一盛茶食糖糯粥栗飯麥仁飯皆以棗栗布其

上晚大風作

三日甲寅晴風益甚赴花宴于大安殿大率如元日加  
酒二行五行後四趨國主先起百官出就簪花剪綵為  
之惟藥枝甚異或四或二長二尺許花為雜色狀如錦  
帶翹起幙頭四角後垂柳四枝是日風既暴狂幾不可  
行花葉飄墜者往往有之少頃六趨國主復坐又四行  
而罷是早見黃土鋪道中由左翔龍門出應天中門折  
而東向知國主以元日謁原廟云

四日乙卯晴射弓宴張倬賜生餼高蕙賜宴完顏高賜  
酒果完顏仲雄押宴仲雄于進趨酬應一無所能手有  
雕青細字蓋以射選借官而來射雖不能命中而善于  
發矢人多服之酒七行各分位換窄衫束帶將出射宰  
執遣右司張汝弼傳語問俘擄人事既退使副及館伴  
射弩仲雄射弓射垛設庭下上畫火珠夾以小飛鶴二  
下畫一綵架以承射帖夾以大立鶴二綠竹數竿帖上  
初為銀碗五每頭二矢少頃加四花二矢押宴館伴國

信使副知閣五人以次執一矢起揖以射皆坐胡牀庭下分列錦衣金帽衛士五十人樂人立其左又衛士一人為押宴執弓矢二人為館伴過弩一人端箭二人立堦側喝箭射每中則面廳偃立撒手報覆樂使喝打著即樂作否則以擡捺後手見曉初中時先望闕拜賜衛士以元矢穿所中銀標引賜物過其前就坐共飲勝者酬酢必遍然後復射標子重三兩中角花者隨所中而得中的者舉九標得之以其一與喝箭者初中亦如之

使副拜賜之後但欲成禮即已伴使志在于得抵暮不肯休屢謝止之方已兩廳過弩者各以二楮酬其勞易衣就座又二行而罷倬口宣云遠將慶幣來會春朝方休徒御之勞宜有餽牽之賜蕙云長途遠屆使事告成將觀射御之容宜示宴私之寵高云已成使事將向歸途宜有珍頒以彰寵遇

五日丙辰晴入辭仁政殿客省茶酒既罷引使副欲入而閣副云合自下入辭遂復回幕次乃引三節人拜賜

宣明門外次引高麗西夏二使及使副至隔門外夏使已出麗使方辭少俟至丹墀下面西立俟通班面殿方拜唱有敕兩拜又唱賜衣帶鞶馬足段等义手左跪受賜以賜目納懷中就一拜舞蹈五拜再唱賜酒食又五拜升露臺少立舍人兩行各三人齊揖以入欄子內副使躬身使少前拜跪受書卻行與副使齊立躬身俟傳示訖復退行三步左下丹墀再面殿立躬身聽喝好去由右而出賜茶酒五行于館韓鋼押伴

六日丁巳晴先發輦車行使副率三節人同館伴出至  
燕賓館賜宴完顏元賜酒果完顏宗安押宴仍差安德  
德裕送伴盡偕回程私覲泛送從之車馬欲行安德方  
呼其家人以細車般所得還家如木綿之類復載至汴  
京滯留至晚方行燕山本召公所封秦滅燕以為上谷  
郡武王封堯後于薊即薊縣也二世時韓廣自立為燕  
王項氏封臧荼高帝封盧綰皆都此太行燕山大防山  
綿亘千里隱然一都會金又以宮室侈大之古所未有

也又改曰大興府其守為尹車行六十里更盡宿良鄉縣

七日戊午晴五更車行八十里涿州早食又六十里宿定興縣

八日己未晴五更車行六十里安肅軍早食又四十里宿保州

九日庚申晴陰風有雪意四更車行七十里望都縣早食又行五十里道中看大龍桑小龍桑宿中山府



十日辛酉晴四更車行五十里新樂縣早食又行七十里宿真定府道傍老嫗三四輩指曰此我大宋人也我輩只見得這一次在死也甘心因相與泣下

十一日壬戌晴賜宴張汝說口宣云復將使指少憩中途宜示宴慈以光行色又云使命改轅介藩弭節宜頒寵賜增重皇華同知真定尹田鍾吉押宴

十二日癸亥晴三更車行六十里藥城易驢馬三十里飯趙州城角樹上有蘆蓆裏一人云是強寇李住兒自

煬王時作梗劫人婦女以要財物至是以弓弦斷為弓  
手所捕挑脊筋挂樹上死矣直候支到賞給方取下埋  
殯又六十里宿柏鄉縣與去偽以馬前行再讀光武碑  
十三日甲子四更車行六十里飯內丘縣天明雪作至  
晚方止又四十五里宿邢州北門曰拱德

十四日乙丑霽子下天明開霽四更車行二十五里至  
沙河縣易驢馬又三十五里飯臨洺鎮食後與去偽馬  
行四十里宿邯鄲縣雪後塵清盡見太行山色邑中沿

街作燈洞頗可觀

十五日丙寅晴車行七十里磁州早食燈火尤盛出門  
簾車有折軸者隨便副乘馬過漳河登車六十里至相  
州使副復上馬入城燈洞不如磁州之多而工巧過之  
秦樓街尤繁華自北門至南門約七八里所士女多靚  
粧擁觀有食店挂一燈上為胡羊中橫一瓠下為經一  
卷蓋河朔人語音以羹為經也宿城外安陽驛把車人  
言去年十二月方差使一番為年時被蒙子國炒舊時

南畔用兵盡般軍器在南京今卻般向北邊去三月中  
般用牛三千頭般未盡間被黃河水漲後且休問驢馬  
價云驢上等有直四十千者馬更高貴舊時家家有馬  
煬王南征盡刷去不知幾萬萬匹後來都是行歸而今  
又殃我等貴價買問絹帛價云好絹每疋二貫五百文  
絲每兩百五十文並六十陌又有云越王不平其弟為儲國  
主曾以女小底十人賜之遜謝不受云他日生出孩兒  
來亦無用處蒙古國作梗太子自去邊頭議和半年不

決又且歸今又遣莫都統提兵去軍子云我輩三四口種少麻豆足了得喫舊時見說廝殺都歡喜而今只怕簽起去彼此休廝殺也好又有云我見父母說生計人口都被他壞了應河南北錢物都般向裏去更存活不得

十六日丁卯晴四更車行三十六里飯湯陰縣又七十五里宿濬州安德暮夜叩門送私覲

十七日戊辰晴風三更車行二十五里三角路上換驢

馬一路可入滑州又四十五里武城鎮早飯馬行至黃河去程所行李固渡口以冰泮水深柴路不可行又稍上三四里先橫過中澗上入水牽挽數里拋過南岸待車船至方行循河至浮橋邊掃岸又行荒草陂澤中四十五里宿胙城縣

十八日己巳晴三更行四十五里飯封丘短牆為城人烟牢落便遠不及河北日未午又行四十五里抵東京北郊青城側亭子換馬具衣冠所過桑遠館但有斷垣

敗屋入順常元武二門二門之間過五丈河菜市橋夷  
門山巷口百王宮乃煬王毬場親從第一指揮舊日御  
龍直也由竹竿巷口斜街入第二門土市馬行街皇建  
院巷德勝橋轉太廟巷口東行相國寺出御街歷廊屋  
三十間過權貨務又廊屋七十間中有小門是國子監  
前後御廊尚多不知其數投西穿門由舊路入驛

十九日庚午晴收銀絹十疋兩赴宴完顏元賜宴酒果  
南京路都運梁鈺押宴宴罷行四十五里宿陳留縣

二十日辛未晴車行六十里至雍丘縣早飯臨川驛又六十里漸行汴河中宿拱州襄陵驛城外客旅往來人家頗多入城舊有橋河流既斷築隄以行子城內舊是州衙今以屯軍有三箇千戶約有千二百人

二十一日壬申晴四更車行六十里飯寧陵縣永寧驛又六十里宿南京甲士數十甲馬百夾道而陳城門去驛稍遠馬如來時之數而行甚疎意屯軍亦不甚多也是日日有四背氣又白虹貫日日在壬癸荆生言其應



在止

二十二日癸酉晴四更車行四十里飯穀熟縣又三十里沙岡換驢又四十里宿下邑縣會亭鎮

二十三日甲戌晴四更車行七十里飯亳州永城縣又六十里宿柳子鎮聞有天使往山東簽兵人不肯從執天使殺之

二十四日乙亥晴車行四十五里飯宿州臨渙縣蘄澤鎮早頓又四十五里宿宿州汴河底多種麥

二十五日丙子陰晴車行六十里飯蘄縣靜安鎮又六  
十里宿靈壁夜微雨作即止

二十六日丁丑陰晴三更車行八十里飯虹縣又八十  
里宿青陽鎮驛

二十七日戊寅晴四更車行八十里飯臨淮縣過縣即  
見龜山塔及淮山一行已不勝喜躍矣又六十里宿泗  
州自臨淮即依淮西行

二十八日己卯晴先發遞擔簾車即上馬出城使副入

草館同去偽先乘馬至河岸舟至首見季舅洪子度唐  
季潤及呂葵張吉來收家問喜極涕下頃之俟行李裝  
船了卻具衣冠入草館俟使副茶酒畢辭送伴即行是  
日大風拍岸良久方到盱眙謁胡漕龔守不值見王御  
幹取所買物譙提轄司馬尚書後姜叔永司馬季聞張  
伯淳皆往來交謁後綱官屬也宿淮岸

二十九日庚辰微雪早離盱眙過龜山以新制行淮大  
風不可進宿淮岸約去龜山數里

三十日辛巳微雪天明欲舟行風又大作力行而前過  
瀆頭數里風正北駕浪益急又止宿

二月一日壬午後風力稍平衆舟齊行迫暮僅能入  
洪澤舟人交口相賀昔蔣魯公開運河六十里以避長  
淮之險所活不知幾人中間歐家渡最淺使人往還非  
借潮于神不可行官司憚開河剝載之擾創議行淮使  
舟纔四往返無不驚虞此行至三宿淮上波濤春撞有  
魚腹之憂魯公今丞相曾祖為發運使將入奏計自洪

澤至龜山率一二里輒鑿一井以測地之土石既得請  
遂開運河前輩用心至矣可輕改乎

二日癸未晴過淮陰夜過楚州

三日甲申晴過寶應

四日乙酉晴過高郵

五日丙戌雨以沿路水澀寸進甚艱夜宿木鋪壩裏李

潤過儀真俞縣尉

茂先

相見甚欵

六日丁亥雨晚晴昨晚以禮物船與前船舳舻相觸斃

一篙人至召伯埭使副捐金使座之晚過揚州是夜禮物船為暗樁所敗漏發而人不覺同行楊劉羅三人蒙被登岸舟已沈矣抵瓜洲宿

七日戊子晴渡揚子宿丹陽館下侍季舅同去偽見陳待制及魏子智其內子展參賀執禮甚恭金山印老相見渡船中

八日己丑晴城中水澀良久力出門夜過丹陽縣及呂城閘

九日庚寅晴天明過奔牛閘午後過毘陵

十日辛卯晴天明抵無錫使副謁蔣丞相罷即行喻郎中訪及任富來知諸舅來逐夜宿楓橋

十一日壬辰晴過平江城外午後過吳江久苦淺澀至是大風駕太湖水入港張帆而行陳表兄張子家丁表兄胡子淵相見

十二日癸巳晴天未明到秀州同去偽尋見王江陰值送女陳宅未歸見直甫于臥內謁鄭景元判官同年不

遇己聞仲兄見次到廨宇一觀出門李同年主簿相見  
于郵亭王表弟澤同行數里而歸讀江陰奏狀無不擊  
節稱歎夜過崇德抵長河閘

十三日甲午晴天明起見諸親午後過臨平赤岸晚泊  
閘頭使副入仁和館受傳宣賜銀合茶藥因出所撰還  
醮青詞宿稅務下發家書附遞

十四日乙未晴使副上馬赴朝參船入北關以小舟般  
載歸舅家一見至親喜氣自倍而歸興益勇矣是夜與



諸親劇飲醉甚仲舅有詞走筆次韻二闋

十五日丙申晴侍季舅同去偽謝曾知閣不遇又謁范  
丈甚歎

十六日丁酉晴士穎弟攝蕭山尉別去胡春自婺女來  
收景山兄書飯後出謁吳太博胡給事陸寺丞陳大諫  
薛國正茂司業張少卿林編修尤宗丞始聞銅坑之讖  
十七日戊戌晴謁問丘監丞欲問坑冶之詳不值同去  
偽智叟侍叔舅陳表兄以小舟見陸子山留飯而歸赴

景孟舅晚飯被酒先歸

十八日己亥晴飯罷赴梁參政呼召客次遇蜀士郭倅

甲

馮太丞

仲夷

十九日庚子晴吳太博盧監簿連日招飯皆力辭之治

疊行李雨作買船

二十日辛丑小雨即晴諸親作醪泛湖五十餘分以水  
淺不可傍岸盤旋湖中抵暮醉歸

二十一日壬寅雨赴范文飯

二十二日癸卯雨侍仲舅往延祥觀醮筵同上中節兩  
焚香致敬齋罷各散與去偽小舟自湧金門歸先遣承  
局吳蓋行發家書

二十三日甲辰雨先發行李下船兩返方畢使呂葵張  
吉宿舟中期以來早啓行以舅家挽留又展一日

二十四日乙巳晴去偽生朝仲舅與諸親同作慶偷閒  
謁李恩州授般運法是夜大醉中拜辭諸親

二十五日丙午晴早作襍被辭舅家轎行七十里出暗

門由赤山出六和塔下至廟山登舟宿富陽雨作

二十六日丁未晴雨作復止風逆寸進至三江口東風  
微動方理帆忽西風再起甚勁力挽至桐廬凡行九十  
里過青溪

二十七日戊申晴東風張帆過鷓鴣原釣臺下伴伯原  
風止過烏石大浪灘十五郎灘大浪最可畏雖以水漲  
不見灘磧而岐頭水怒良久方上居民以小舟來助刺  
船什伍為羣以舟輕止用一人方當湍流忽隨篙墜水

觀者膽落而少年善泅如履平地復登舟助力撓以百錢而去宿東館凡行九十里去嚴州二里

二十八日己酉雨大作午間加以西風水又盛長舟人疲于牽挽屢止復行晚雨止風靜行至烏岐灘下宿小港中纔行三十餘里

二十九日庚戌晴風亦止但以水漲寸進遇一岐輒移時方能冒險以進懸崖飛瀑所在見之雖快覽勝處至凌犯怒濤亦可駭也所過白雁二岐尤暴怒又過橫流

數處夜同衆舟宿桑林間隔岸望鄉頭終日驚險勞動  
止行三十餘里夜水益長至五更方少退

三十日辛亥晴舟子早起候望前路黃泥岐不可上復  
回數里尋路避之沂流行亂林間半日方出大溪晚至  
蘭溪先以劄子與李尉由懇雇五夫李以庚辰登科其  
子遂夫又癸未同年便訪逆旅繼往見之宿客舍

三月一日壬子風雨早起束裝飯後李尉來訪即行又  
飯竹馬館晚到婺州首見趙金華子濟不值徑入郡學

直舍省景山兄周教授

汝能

雍無錫

希稷

相訪周與景

山兄同官雍同舍也借周直舍安泊少選侍景山兄過

周之五柳堂本蕭侍御

振

所建詩牌尚多盡得雙溪

之勝王察推

枏

亦來訪同飲劇談至二鼓方歸

二日癸丑雨侍景山兄見李使君

衡

留來日一飯客次

遇解節推

延運

是日景山兄周趙雍王醵就五柳相招

早飯又坐養原堂無盡藏台人陳文學

愿

周之故人也

同坐解推又約晚飯六人徑自五柳赴之李知錄張義

烏同集于酉退軒琴棋投壺坐客皆醉李糾又約來日  
早飯

三日甲寅兩侍景山兄同周教授謝李使君客次遇唐

正字

仲友

遂復還無盡藏同出梅花門過浮橋數里迂

蘇倉

嶠

歸見唐正字歸學發五擔付張吉先歸侍景山

兄赴李糾飯坐清遠樓景物尤勝同會七人解張雍王

酒三行李守速客即往赴之劉判院

藻

陳子厚同集小

候自公堂坐半政堂勸酒移忠堂酒罷劉先歸余四人



復過五柳手談清飲夜分乃散

四日乙卯陰晴微雨間作早別景山兄即行三十五里

飯摩訶樣又行數里遇麗水林丞良過婺鞠獄相見逆

旅宿楊公橋永康界首行八十里


五日丙辰晴過永康數里飯至李溪遇承局持家書來

接晚過黃壁上卷乾道五年十月二十一日行三十里飯黃碧一十八里宿和尚店去李溪猶

二里此云過永康數里飯至李溪晚過黃壁似黃壁與黃碧係一處而壁碧互異姑各仍原文

六日丁巳雨過縉雲邑官相迓皆謝之獨見李同年又

送過大溪而別縣得四夫又荆山寺四夫輪番舁轎冒  
雨登馮公嶺至天寧寺已昏黑仲兄器之仁甫不愚元  
聲漳張子質相接先行還家拜二親燈下上下無恙歡  
聲相聞喜可知也



攻媿集卷一百十二